

**MESYUARAT PERTAMA PENGGAL PERTAMA  
DEWAN UNDANGAN NEGERI PULAU PINANG  
YANG KEEMPAT BELAS  
02 OGOS 2018**

**PERKARA : 4(B)(I)21**

**SOALAN BERTULIS OLEH AHLI KAWASAN MACHANG BUBUK  
YB. LEE KHAI LOON**

21. Keluarga B40 hilang punca pendapatan apabila Ketua Isi Rumah (KIR) meninggal dunia.
- (a) Apakah bantuan dan usaha Kerajaan Negeri dalam menangani isu ini?
  - (b) Apakah kekangan dasar kerajaan yang menyebabkan golongan B40 ini tidak menerima bantuan kewangan kecemasan?
  - (c) Sejauh manakah bantuan tersebut dapat membantu keluarga B40 keluar dari kepompong kemiskinan?

**YB. PHEE BOON POH  
MENJAWAB BAGI PIHAK Y.A.B. KETUA MENTERI**

21. (a) Antara bantuan dan usaha Kerajaan Negeri dalam menangani keluarga B40 yang telah hilang pendapatan apabila ketua isi rumah meninggal dunia ialah seperti berikut:
- (i) **Program Agenda Ekonomi Saksama**  
  
Kerajaan Negeri telah memperkenalkan Program Agenda Ekonomi Saksama (AES) iaitu sebuah program pembasmian kemiskinan yang memberikan bantuan kewangan bulanan secara *top-up* kepada individu/keluarga yang mempunyai pendapatan per kapita RM220.

Selain itu, Kerajaan Negeri melalui Jawatankuasa Pembasmian Kemiskinan turut membantu anak-anak golongan miskin yang kurang berkemampuan dan tidak mampu membiayai pengajian ke peringkat lebih tinggi, mereka akan disyorkan untuk menyertai program *Vocational Skills Employment Programme* (VSEP) iaitu sebuah program yang menawarkan kursus-kursus kemahiran untuk belajar sambil bekerja dalam bidang yang diminati. Dalam program *Vocational Skills Employment Programme* (VSEP), pelajar diberi biasiswa dan juga elaun latihan vokasional. Syarat utama bagi program ini adalah mempunyai sekurang-kurangnya Sijil Peperiksaan Malaysia (SPM) dan keputusan peperiksaan Sijil Peperiksaan Malaysia (SPM) bukanlah keutamaan.

Kerajaan Negeri juga sedang merancang untuk meminta Kerajaan Persekutuan untuk mengkaji semula Paras Garis Kemiskinan (PGK) dan perkapita semasa yang dilihat agak kurang relevan berbanding peningkatan kos sara hidup pada ketika ini. Kerajaan Negeri bercadang untuk menaikkan Paras Garis Kemiskinan (PGK) daripada RM930 kepada RM1,500, perkapita RM220 kepada RM400 selaras dengan kesan kenaikan kos sara hidup dan dan peluang pekerjaan yang semakin rendah.

## **(ii) Program iSEJAHTERA**

Kerajaan Negeri akan meneruskan program iSejahtera bagi menghargai dan mengenang jasa bakti rakyat yang merangkumi Warga Emas, Orang kurang Upaya (OKU), Ibu Tunggal, Suri Rumah, Pelajar, dan Bayi yang merangkumi program berikut:

- Program Penghargaan Warga Emas, Program Bantuan Orang kurang Upaya (OKU), Program Bantuan Ibu Tunggal, Program Ibu Emas dan Program Skim Pelajar Emas yang dilaksanakan setiap tahun dengan sumbangan sebanyak RM100 seorang;
- Skim Pelajar Emas di mana bayaran RM100.00 secara *one-off* diberikan kepada pelajar Tahun 1 dan 4, Tingkatan

1 dan 4 bagi meringankan beban ibu bapa;

- Program Anak Emas yang merupakan program penghargaan kepada setiap kelahiran rakyat negeri Pulau Pinang akan diberi RM200.00 secara *one-off*; dan
- Bantuan one-off sebanyak RM1,000.00 kepada waris warga emas, ibu tunggal dan Orang kurang Upaya (OKU) bagi pengurusan jenazah.

### **(iii) Program Ekonomi Khas**

Kerajaan Negeri akan meneruskan Program Peningkatan dan Pemulihan Ekonomi (Bantuan Peralatan) di bawah Projek Khas Ekonomi. Program ini memfokuskan kepada peniaga kecil sepenuh masa termasuk golongan miskin yang telah menjalankan perniagaan sekurang-kurangnya satu (1) tahun dan berpendapatan perniagaan kurang dari RM3,000.00 sebulan. Bantuan peralatan bertujuan bagi membantu peniaga mengembangkan perniagaan sedia ada untuk *output* yang lebih besar.

### **(iv) Skim Pinjaman Harapan (SPH) Negeri Pulau Pinang**

Skim Pinjaman Harapan (SPH) Negeri Pulau Pinang yang dahulunya dikenali sebagai Projek Titian Saksama Rakyat (PTSR) Negeri Pulau Pinang akan diteruskan bagi mengurangkan kemiskinan melalui program mikrokredit yang memberikan pinjaman tanpa sebarang cagaran dan penjamin kepada peniaga-peniaga kecil untuk membantu usahawan tempatan, penganggur dan golongan miskin untuk menceburi bidang perniagaan.

### **(v) Tabung Usahawan Tani (TUT)**

Kerajaan Negeri telah memperkenalkan Tabung Usahawan Tani (TUT) Negeri Pulau Pinang yang sebelum ini dikenali sebagai Tabung Usahawan Tani Muda (TUTM) yang memberi dorongan kepada golongan belia termasuk golongan miskin untuk menjadikan sektor industri asas tani sebagai kerjaya dan berpotensi sebagai punca pendapatan

yang lumayan.

**(vi) Penang Career Assistance And Talent Centre**

Kerajaan Negeri melalui Pusat CAT (*Penang Career Assistance and Talent Centre*) menjalankan pepadanan jawatan kepada semua golongan pencari kerja termasuk rakyat miskin berdasarkan penawaran oleh industri.

**(vii) Program Meister Malaysia**

Dalam membantu rakyat miskin mendapat peluang pekerjaan, Kerajaan Negeri melalui *Penang Skills Development Centre* (PSDC) telah memperkenalkan Program Meister Malaysia bagi meningkatkan bakat dalam bidang teknikal dan vokasional selari dengan perkembangan Industri 4.0. Kerajaan Negeri telah memperuntukkan RM6 juta untuk Program Meister Malaysia. Peserta yang terpilih akan menjalani latihan peningkatan kemahiran dan pada masa yang sama bekerja di kilang untuk memperoleh kemahiran pekerjaan yang sebenar. Para peserta program ini tidak perlu membayar yuran pengajian kerana telah dibiayai Kerajaan Negeri dan pada masa yang sama menerima gaji daripada syarikat tersebut.

(b) Kerajaan Negeri melalui Jabatan Kebajikan Masyarakat (JKM) menyediakan tabung bantuan segera dengan kadar bantuan maksimum sebanyak RM500 kepada mereka yang hilang punca pendapatan. Jumlah kadar bantuan dan kelulusan permohonan adalah berdasarkan pertimbangan Pejabat Kebajikan Masyarakat (JKM) Daerah masing-masing.

(c) Setakat Jun 2018, seramai 1,117 orang miskin telah mendapat manfaat daripada Program Agenda Ekonomi Saksama (AES) dengan jumlah perbelanjaan sebanyak RM29,586,722.00. Selain itu, Program iSejahtera telah memberi manfaat kepada pelbagai lapisan masyarakat termasuk golongan B40 dengan perbelanjaan sebanyak RM249,454,140.00.

Sehingga kini, Program Peningkatan dan Pemulihan Ekonomi (Bantuan Peralatan) di bawah Projek Khas Ekonomi telah memperuntukkan sebanyak RM1,419,848.12 kepada 640 orang rakyat miskin di semua daerah.

Bagi Skim Pinjaman Harapan (SPH) Negeri Pulau Pinang, dana sebanyak RM11 juta telah disediakan bagi tujuan ini. Jumlah pinjaman adalah di antara RM2,000 hingga maksima RM25,000 dan tempoh bayaran balik adalah di antara 2 hingga 3 tahun. Sehingga bulan Jun 2018, sebanyak RM14.77 juta telah diagihkan kepada seramai 2,974 orang usahawan termasuk golongan B40.

Kerajaan Negeri juga telah menyediakan peruntukan Program Usahawan Tani Muda sebanyak RM750,000 dan sehingga Jun 2018, sebanyak RM582,000 telah diagihkan kepada 108 orang belia yang terdiri daripada golongan B40 untuk menikmati kemudahan kredit ini.

Manakala bagi Program Meister Malaysia, Kerajaan Negeri telah membiayai 162 orang termasuk golongan B40 bagi meningkatkan bakat mereka dalam bidang teknikal dan vokasional selari dengan perkembangan Industri 4.0 ini.

Selain itu, sejak penubuhan Pusat CAT pada Mac 2009 sehingga Jun 2018, seramai 10,205 orang termasuk golongan B40 telah berdaftar sebagai pemohon pekerjaan di mana sebanyak 6,430 pepadanan jawatan telah dijalankan iaitu sebanyak 63%.

Semoga dengan usaha gigih Kerajaan Negeri dapat membantu golongan B40 ini keluar dari kepompong kemiskinan dapat mampu berdikari pada masa hadapan.